

# **O Tamali'i Samoa Ma Lo Latou Sao I Le Tau Amataina O Le Ekalesia**

*Matagaluega o le Tala Faasolopito o le Ekalesia*

*Kolisi Faafai'feau i Malua*

*Pepa Mafutaga Faafouina 2025*

**Rev. Dr. Arthur Wulf & Fraser Tauaivale**

## **Faatomuaga**

Tulouna lava! Le paia o leni mafutaga mamalu i le Susu o le Susuga i le Taitai o le Mafutaga o leni aso, Susuga i le Toeaina, le saofaiga malu a Tama o le Ekalesia, Susuga i Toeaina Faatonu, Susuga i Toeaina, faapea Susuga i Faafeagaiga o le au faigaluega tofofi o le Talalelei. Malo le pale, malo le mafuta. Matou te faatalofa atu i le suafa manumalo o lo tatou Alii o Iesu Keriso, le Ao o le Ekalesia.

O le ma faasoia ma le Susuga i le Faiaoga ia Fraser Tauaivale, o le toe faamati'eina lea o sao o nisi o tamalii Samoa, i le galuega talai o le Talalele, i le tauamatamataina o le Ekalesia i Samoa nei ma le vasa Pasefika. Aua foi o le sao taua o nai o tatou tagata Samoa, e mafuli lava i le tatanu i tusitusiga a tusitala o le Talafaasolopito mai Europa. O tamalii la o le a faaautu iai le ma faasoia i leni aso, o Sooalo Laupue Agaimalo o Samauga ma Tuilaepa Esekia Matetau o Manono. Ua mafua ona ma filifilia nei tamalii, ona e iai nai feteenaiga o faamaumauga a papalagi ma le au suesue o le Talafaasolopito, i a la galuega mo le tauamatamataina mai o le Ekalesia Kerisiano i Samoa nei ma le vasa Pasefika. O le a vaevaeina leni tautalaga i ni vaega se lua; o a'u o le a talatalaina atu le sao o le tamalii i a Sooalo Laupue Agaimalo, ao le Susuga ia Fraser, o le a talanoa atu e tusa ma le sao o le tamalii i a Tuilaepa Esekia Matetau, i le galuega a Keriso.

## **Sooalo Laupue Agaimalo (Sualo)**

### **Sooalo le Misionare**

#### **E Tusa ai ma Faamaumauga a Misi ma le Au Suesue o le Talafaasolopito.**

O Sooalo poo Sualo e iloa ai i tusitusiga a misionare, o se tamalii mai le afioaga o Samauga i le motu o Savaii. Ua iloga lona suafa i le Talafaasolopito o le Ekalesia i le motu o Efate (poo Fate) i Vanuatu, aua o ia lea na faatoai iai le taunuu atu o uluai misionare o le LMS, i le tausaga e 1845.

O le malaga lea o le malaga faamisionare lona lima (talua mai le malaga muamua lea na tagatavaleina ai Ioane Viliamu i Eromaga i le tausaga 1839) mo motu o i le Atu-Sisifo o le vasa Pasefika. O le malaga faaauau e molimoli le Talalelei ma asia misionare Samoa ma isi misionare o le atu Polenisia, o faapena ona fitaituga i le galuega talai. Na muai afea e le malaga Rotuma, Tana, Aneitiuma, na ui ane foi i Fotunna ma Eromaga, ae e lei mafai ona tulaueleele ona o le matamataita o tagata o ia motu.

Ao i ai le malaga i gatai o Eromaga na faalatalata ane le vaa ta asi (sandalwood merchant ship) na i Efate ma faailoa ane i misionare, le alii o Sooalo ma tagata Samoa ma tagata Toga o aumau i le motu o Efate ma lo latou manao mo ni misionare Samoa. Aua na logo tala i misionare na i isi motu o Vanuatu ma le latou talaiga o le Lotu Fou. Ia ma sa faapena foi ona faamatala iai e alii vaa o le vaa ta asi, le tulaga ua iai Samoa ma le tapuaiga Kerisiano. Ma na naunau le alii o Sooalo, e fia iloa atili le Atua ua tapuai ai Samoa, ma ofo lana fesoasoani mo misionare mai Samoa. O le tala lea na faasaga ai loa le vaalotu mo Efate, o le Aso muamua o Me na taunuu ai i gataifale o Efate le malaga ma sailia loa Sooalo.

O loo faamatala auiliili e le Susuga Oka Fauolo ma le lipoti a Misi Tana (Turner) ma Misi Mare (Murray) o i le Sulu Samoa o le 1845 le taunuu atu o le malaga ma le sailiga o Sooalo, e alii misionare o Stefano ma Leiataua ma se alii Niu Sila (o se tasi o le auvaa o le vaa ta asi) na aumau i le fale o Sooalo i Efate mo sina taimi.<sup>1</sup> Na latou o i uta i le nuu o Sooalo, ma aami ma aumai ia te ia i le vaalotu e feiloai ma fetufaai ma le aumalaga e faatatau i uiga o tagata o le motu. I le maea ai o lea feiloaiga, na agai loa i uta le malaga aua le amataina o le galuega talai o le Talalelei.

O le aso muamua o Me i le 1845, o loo faailogaina pea e tagata Efate na taunuu ai le Talalelei i o latou laufanua ma loo faamanatuina ai foi ma le taua o le sao o Sooalo i le totoina o le fatu o le Talalelei.

E tusa ai ma faamaumauga a Misi Tana ma Misi Mare o i le Sulu Samoa.<sup>2</sup> O Sooalo o se toa Samoa na folau mai ma le pasese e 50 (o tagata Toga ma tagata Samoa) mai Palauli mo Toga, i le maea ai o le taua i Atua. E manatu le Susuga a Oka Fauolo, o le taua i le va o Mataafa ma Malietoa ma Tamafaiga i le vaitau o le 1825 agai mai i le 1829, sa matagia le faigamalaga ma a'e ai i le tasi motu o Efate, e igoa i a Tongoa. Faimai sa fetai ai ma le maemaea o tagata o lea motu, ma e lei umi na nonofo ai, aua sa faasagatau atu pea tagata o nuu ma motu tuaoi. Na taumafai foi e toe folau mo

---

<sup>1</sup> Oka Fauolo, O Vavega o le Alofa Lavea'i, pp. 102–104; Silasila foi i le Sulu Samoa vol. 3, no 2 (August 1845): 19–21.

<sup>2</sup> Sulu Samoa, Vol 3, no 2 (1845)

Toga faapei ona uluai fuafuaina mo le malaga, ia ae toe matagia foi le malaga ma tulaueleele ai i le motu o Efate. Na maliliu nisi o le faigamalaga i taua faapea faamai. O loo taua e Fauolo nisi o suafa o le au malaga, na faapena ona faamauina e Misi Tana ma Misi Mare.

Na iloga le faigofie o le totoina o le Talalelei i Efate, ma na faafiafiaina ai Misi Tana ma Misi Mare. Faimai Misi Tana, o le aao lava o le Atua na tuua ai Sooalo i Efate mo le faamoemoe o lana Talalelei. Mafua ona faigofie le galuega a misionare, ona ua iloga tala i le motu o Efate i le toa o Sooalo. O ia na lolofi ane ai alii o le motu e tauina a latou taua, ma e leai se itu taua o tagata o le motu na faiaina ai Sooalo ma lana au tau. O le mea foi lea e lei fia lotea ai e se tasi o le motu, misionare, aua e fefefe uma ia Sooalo. E lelei foi ma mafana sootaga a Sooalo ma alii o le motu. Ae le gata i lea, sa fai Sooalo ma sooupu, e faaliliuina le Talalelei i le va o misionare ma tagata Efate. Ao lei o ese mai Misi Tana ma Misi Mare, na tuua misionare Samoa e amata le galuega i lalo o le faamalumaluga ma le puipuiga a Sooalo; o Setefano ma Mose i le pitonuu o Sooalo, ao Sipi ma Taavili i le pitonuu i le isi pitonuu, i le vaaiga a le alii o Talakolako.

E lei toe tele ni faamatalaga faatatau i a Sooalo i ripoti a Misi. I le ripoti o le malaga lona ono i le 1846 lea na taitaia e Misi Kili (Gill) ma Misi Nisapeti (Nisbet), o tala fiafia lava i le alualu pea o le Talalelei, e ui lava e iai nai fatiatamai na feagai ma misionare, ao Sooalo na faasaga pea i le galuega. Ua le gata i lana pupuiga o misionare, ae ua faapena foi ona ia ave le faitalia mo misionare, e filifili ai le faaogaina o fanua mo le galuega. Ma na tuumuli le Vaa Lotu, ae faaopoopo misionare e faamalosia le galuega Talai.

Na toe afea Efate i le malaga faamisionare lona valu i le tausaga 1848 ma le 1849. O le tala faanoanoa, ona ua tulaga leaga le galuega i le motu. O le toatele o misionare mai Samoa ma le pasefika na galulue ai ua fano faatasi ma o latou aiga. Ua toatolu ua maliliu i taua faatasi ai ma nai fanau. Ao isi misionare ma aiga ua po'ia i faamai. Ia ae o lo o maitauina le tuputupu pea o le galuega, ma sa tuua ai le misionare e toatasi e fesoasoani i le galuega. I ripoti faaumiumi o i le tusi a Misi Kili, o le malaga o le 1848<sup>3</sup> ma le Samoan reporter mo le malaga o le 1849,<sup>4</sup> e leai se tala o faatatau i a Sooalo ma lana galuega i Efate. A o le taimi lea na iloga ai le osofaia o misionare i le maemaea o tagata tau o le motu. Ae na toe taua Sooalo i le ripoti a Charles Hardie i le tausaga 1854, lea na ta'ua ai lo la malaga faatasi mai ma le misionare i a Setefano

---

<sup>3</sup> William Gill, *Gems from the Coral Island: Savage and Christian Life in the South Sea Islands* (London: S. W. Partridge and Co, 1855), pp. 210-217.

<sup>4</sup> Samoan Reporter, no 10, November, 1849, pp. 4ff.

mo Samoa, ina ua faamatuu atu le galuega faamisionare i Efate, i le Ekalesia Periperiane toe Fuataina a Sikotilani.

## **E Tusa ai ma le Tala a Suli ma le Aiga o Sooalo**

I le tausaga e 1995, na faamanatuina ai le 150 tausaga o le taunuu atu o le Talalelei i Efate. I lea faamoemoe, na valaaulia ai le Ekalesia Samoa, ma o lea na filifilia ai le Susuga i a Oka Fauolo ma Lotu Uele, e fai ma sui o le Ekalesia.<sup>5</sup> Na auai ai foi le fetalaiga ia Sooalo Siaosi ma lona afafine o Sareta, e fai ma sui o suli o Sooalo. Faimai le mau a le aiga i le faamanatuina o le 150 tausaga, na fai ai se tala faakoneseti i le taunuu atu o uluai misionare. Na aofia ai foi ma le aumalaga i le faatinoina o lea tala. Sa talosaga le toeaina o Sooalo ina ia ave le faamua i le Susuga i a Oka Fauolo ma le Susuga ia Lotu Uele, ona o taitai o le Ekalesia. Ia ae e lei taliaina e le Ekalesia i Efate, ona o lo latou manatu e tatau pea ona faasolo e faapei ona iai i le Talafaasolopito. Aua foi o Sooalo lava na taimua i le momoliina atu o alii misionare i uta i le motu, ma o ia foi na puipuia alii misionare mai le matamataita o tagata nuu o Efate.<sup>6</sup> E faasa'o i molimau a le aiga le mau a Misi, o Sooalo o le toa ma le tagata tau, aua o le latou mau, o le latou tama e tino ese, maualuga ma au malosi.

Ae i ai nai vala o le molimau a Misi ma le au suesue o le Talafaasolopito, e le lagolagoina e le aiga o Sooalo. E iai lo latou manatu na faatalaleleiina lo latou tama i a Sooalo, ao lei malaga ma tafea ai i Efate. O le latou mau, na tafea Sooalo ma lona auvaa i se taimi a ua tuanai atu le taunuu mai o le Talalelei i Samoa (I tua mai o le 1830). O le pine o lea mea, na tafea faatasi Sooalo i Efate ma lona afafine e igoa i a Sarai, e faapei o Sarai le avā a Aperamo o i le Tusi o Kenese. O lona afafine lea na malaga mai Sooalo mo Samoa, ae nonofo ma le alii Pomare. E oo mai le asō, o loo i ai pea tagata na tupuga mai i a Sooalo o loo aumau i Vanuatu. E aofia ai ma le alii o Korman Maxime Karlot, o le sa avea ma Palemia o Vanuatu i le 1995. Ma o loo feiloai pea le aiga o Sooalo i Samoa nei ma i latou o i Vanuatu, i tauaofiaga a le Pasefika e faia mai i Samoa nei, faapei o taaloga a le Pasefika, o faaaliga o tu ma aga ma fonotaga faavaomalo. O le taimi mulimuli na feiloai ai ma suli o Sooalo mai Vanuatu, o le fonotaga a Taitai o le Taupulega i le tausaga na sei mavae atu. O le isi pine o le igoa o le alii o Pomare. O loo taumate pea le au suesue o le Talafaasolopito pe iai se sootaga ma Pomare o Tahiti lea na taliaina misionare i Tahiti i le 1797. Ao le igoa Pomare, na faaigoa ai e Sooalo le alii o Talianaulu o Efate. O le faailoga e iai foi sina malamalama o Sooalo i le talafaasolopito o le Ekalesia ma le latou galuega i le Vasa Pasefika.<sup>7</sup>

<sup>5</sup> Silasila ia Fauolo, Vavega o le Alofa Laveai, (2005), pp 127-133.

<sup>6</sup> Faatalatalanoaga ma Sareta Sooalo Seiuli, (2020).

<sup>7</sup> Faatalatalanoaga ma Sooalo Laupue Tina, Rev. Elder Faavae Sooalo ma Sooalo Tofilau Junior.

## Sooalo le Faaliliu Upu (Translator)

Na toe faaogaina e le Atua Sooalo i le tausaga 1855 i le galuega tele o le faaliliuina o le Tusi Paia i le gagana Samoa. o Sooalo o le tasi lea tamalii Samoa na tofia i le Komiti o le Papa o Misi. O i latou na tofia ma filifilia e toe iloiloaina ma teuteu le Tusi Paia Samoa, ao lei auina atu i Peretania e lolomia ma tuufaatasi le Tusi Paia Samoa atoa. O lea galuega na maea i le 1859 ma auina atu ai i Peretania. I le tausaga 1860, na taunuu mai ai le Tusi Paia Samoa, ua tuufaatasia i le faavaa e tasi.

E tusa ai ma le mau a aiga ma suli o Sooalo Laupue Agaimalo, ina ua foi mai lo latou tamā mai Efate, na galue o ia i Vaa Lotu o le Ekalesia na folau mai Apia mo le motu o Savaii. O le faiva lea o Sooalo, o le tagata folau ma le tufuga fauvaa. O lana galuega lea na iloa ai e le Ekalesia, ma mafua ai ona filifilia i le Komiti o le Papa o Misi.



Ata 1: O le igoa o Sooalo Laupue o loo lisiina i Tamalii ma Failauga o Savaii na tofia mo le Komiti o le Papa o Misi.

## Sooalo le Faifeau Samoa

I le tausaga e 1867, na avea ai Sooalo ma faifeau o le Ekalesia i Fagamalo. O loo maua ia faamaumauga i le maa faamanatu o lea Ekalesia i Fagamalo Savaii. O loo lomina ai o Laupue Agaimalo, o le uluai faifeau faauuina lea o le Ekalesia mai le

tausaga e 1867 i le tausaga 1884.<sup>8</sup> E foliga mai i lenei faamaumauga, o Sooalo Laupue le isi uluai Samoa na faauuina ona tofi faifeau, pe a fua iai o le uluai Fonotele o le 1875, na faauuina ai uluai Samoa e avea ma faifeau mo Sakarameta ma le Upu.



Ata 2: O le maa faamanatu o le Ekalesia i Fagamalo. O loo manino ai i le gasologa o le Aufaigaluega o Laupue Agaimalo le uluai faifeau FS.

E au foi iai molimau a suli o Sooalo i lea faamaumauga. O le latou mau, o Sooalo na avea ma faifeau ona sa aotauina foi i Malua. I se taimi mulimuli ane, na iai feeseeseaiga i le va o Sooalo ma Misi o le LMS. O lea na teva ai Sooalo ma galue mo le Malo o Siamani, ma lotu ai i le Ekalesia Metotisi. Mulimuli ane ua faaoga ona tofi faifeau i le Ekalesia Metotisi, ma avea ma tausi matagaluega mo le Ekalesia Metotisi i Fasitoo Uta, ma maluu ma lagomau ai.<sup>9</sup>

## Upu Faaiu.

<sup>8</sup> E faamalulu atu ai lava i le Susuga i le Faafeagaiga ia Taulotoga ma Ekalesia i Fagamalo ona o le faaogaina o mea o lomua i le maa faamanatu e aunoa ma se faatanaga. E lei maua foi se taimi e sailiili ai le Api o le Galuega ma Faatalatalanoa le Susuga i le Faafeagaiga. Ae o le a faapea ona fai ma uia ala uma, mo se faalautega o lenei suesuega.

<sup>9</sup> Faatalatalanoaga ma suli o Sooalo. E lei maua se avanoa lelei e asia ai le Ekalesia Metotisi mo ni faamaumauga e faamaonia ai lea mau a le aiga.

E iai le manatu o le a faamuta ii se taumafaiga vaivai. A e i ai le lagona, o loo i ai pea nai tafa o le soifua o leni toa ma leni auaua o le Talalelei, e fia faamautuina mo se isi suesuega i le lumanai. Ae talosia ua faamalieina le autu o leni suesuega. i le fia faamatieina lea o le sao o leni failauga i le tau totoina o le fatu o le Talalelei i Samoa nei ma le Vasa Pasefika.